



**Imeruersaatit puuinut akitsuutip peernissaa pillugu Naalakkersuisut UKA2024-mut inatsisissamik saqqummiussaqaqqullugit peqquneqarnissaat pillugu Inatsisartut aalajangiiffigisassaattut siunnersut.**

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortaq Aqqalu C. Jerimiassen imeruersaatit puuinut akitsuutip peerneqarnissaanik siunnersuuteqarneranut.

Demokraatit mianersoqqusiuarsimapput, innuttaasunut akisoorujussuannngussasoq maannakkut imeruersaatit puuinut akitsuut atuuttoq pissutigalugu. Isertuunneqanngisaannarsimavoq, imeruersaatit puuinut akitsuusiinermi innuttaasut kaasarfianniit millionerpassuarnik aalleqqittoqassasoq. Taamaamat nunatta karsiata isertitaasa tamanna tunngavigalugu PIAARINAATSOORNERINNARMIK taaneqarsinnaanngilluinnarpoq.

Uannut issualaarniarbunga, nammineerlunga oqaatsinnut, aningaasanut inatsisissatut siunnersuut 2024 suliarigatsigu maani inersuarmi ulloq 27. oktober 2023:

(Issuaaneq aallartippoq)

*”Uani naatsumik eqqaasariaqarpakka isertitat immikkut ittut, Naalakkersuisut poortuutissanit isertitassatut naatsorsuutigisaat. Tassani pineqarput 100 millioner koruuningajaat, tassanilu pineqarlutik isertitat Naalakkersuisut siusinnerusukkat isertissimannngisaat. Paasiuminaatsuliussanngilanga, kisiannili paasiinnarlugu, tassanngaannaq 100 millioner koruuninik ilassutitut akitsuutinit isertitsisoqarsinnaannginnera. Aatsaat 100 millioner koruuninik ilassutitut akitsuutinit isertitaqartoqarsinnaavoq innuttaasut kaasarfiannit aanerisigut. Taamannarpiarluuna, Naalakkersuisut iliorlutik aallartittut. Kannutsaatsuliorneruvoq, ammanerusumik oqallisigineqanngimmat.”*

(Issuaaneq naavoq)

Taanna oqaaseqaatiga 100 procentimik aalajangiusimavara. Naatsorsueqqjissaarnerup inerneraa, 85 millioner koruuninik immikkut akitsuutinit aallertoqarnera, tamannalu eqqorpassippoq eqqoriarakku 100 millioner koruuniussasut.

Uani, tassani pisumi uuminartinnerpaasara unaasimavoq, Naalakkersuisut ilumoortut innuttaasunut isertuunniarsarimmatigit. Naalakkersuisut politikkiminni ammanerusariaqarput uneqqarinnerusariaqarlutillu. Napertuilluaqqjissaarpormi, akitsuutinit isertitaqarnerunissamik kissaateqartoqarsimappat, taamaalioraannili ammanerusumik suleriuseqartoqartariaqarluni. Politikikkut nassuerutigineqaannarli. Maannami isigalugulu tusaavagut naalakkersuisooqatigiit nipittartuliiniersarinerat annikittunnguamik imeruersaatit akitsuutaat apparniarneranut. Tupinnarujussuaqaat toqqorterlugullusoq taamani aaliangiismanertik maanna annikittunnguamik killormut imminut pattalaarujulluni iliuseqarnerat.



Neriuppugut, siunnersuummut amerlanerussuteqassalluta innuttaasunut pitsaasusaaq anguniarlugu.

Taamatut oqaaseqarluta siunnersuut akuerineqartussatut innersuupparput aammalu Aningaasaqarnermut-aamma Akileraartarnermut ataatsimiititaliami suliareqqinneqartussatut innersuullugu.